



Allianz von Humanisten
Atheisten & Agnostiker

D'Spill mat der Angscht

Carte blanche vum Laurent Schley op RTL-Radio

28.06.2017

Angscht virum engem laange Stierfprozess mat vill Wéi hu wuel déi meescht vun eis. Verständlech. Mä wéi ass et, wa mer da bis gestuerwe sinn? Musse mer Angscht virum Doud hunn? A wat huet Relioun mat där Angscht ze dinn? Doriwwer e puer Iwwerleeunge vum Laurent Schley a senger Carte Blanche mam Titel „D'Spill mat der Angscht“.

Mënsche sinn di eenzeg Déieren, déi sech net nëmme bewosst sinn, dass se iergendwa musse stierwen, mä déi sech och Gedanken doriwwer maachen, ob et nom Doud iergendwéi weidergeet, a wa jo, wéi. Während Atheisten der fester Iwwerzeegung sinn, dass et nom Doud endgültig eriwwer ass, an Agnostiker éischter mengen, dass een dat net zu 100% ka wëssen, gouf a gëtt et nach haut bei ville reliöse Leit divers an abenteuerlech Virstellung vum engem Weiderliewen nom Doud.

Mä wéi ass et mat der Angscht virum Doud? Verschidde Gleeweger behaupten, de Glawe géif hinnen déi Angscht ewechhuelen. Ass also déi Angscht bei reliounsfräie Leit elo méi verbreet? Schonn de Philosoph Seneca huet drop higewisen, dass den Zoustand no eisem Doud wuel net fundamental géif ofwäiche vum Zoustand virum eiser Gebuert. A vu dass mer duerch deen Zoustand net allze traumatiséiert waren, dierft et och nom Doud net sou schlëmm ginn. Anescht ausgedréckt: mir ware virdu Milliarde Jore laang dout, a gi just an deen Zoustand zeréck. Den Epikur huet flott erkläert, dass eise Wéi duerch eis Sënner entsteet, a vu dass déi Sënner mat ons stierwen, kann een nom Doud och näischt méi spieren. Mat e bëssi Nodenke kann een d'Angscht virum Doud also iwwerwannen a säi Liewen a vollen Zich genéissen.

Ob een un ee „Weiderliewen“ nom Doud gleeft oder ob een den Doud als Enn vu senger Existenz betruecht, kann Auswierkungen drop hunn, wéi ee säi Liewe féiert. Atheiste konzentréiere sech meeschtens ganz op déi Joren, déi hinne vergonnt sinn, mol hedonistesesch, liewensgenéissend, mol egoistesesch, nom Motto „ech wëll alles an dat elo“, ganz oft awer och altruistesesch, well se wëssen, dass och déi aner just ee Liewen hunn.

D'Net-Genéissen oder souguer dat komplett Ofleene vum Liewen ass also éischter een Aspekt vum engem verrannte reliöse Glawen, verbonne mat der Hoffnung, dass nom Doud am Paradäis jo schliisslech alles besser ass. Déi Iddi gëtt Gleewege säit Joerhonnerte mat Erfolleg agetriichtert. Den daperen Zaldot soll op d'Opnam an den (Zaldoten-)Himmel hoffen, an dofir



Allianz von Humanisten
Atheisten & Agnostiker

ouni Angscht fir d'Saach vun deenen déi un der Muecht si stierwen. Aus Glawensgrënn eraus keng Angscht virum Doud hunn well nom Doud eppes Besseres géif waarde féiert zu all deene reliéis motivéierten Dramaen, déi och haut nach reegelméisseg an de Noriichten optauchen. Fir sécher ze stellen, dass di Gleeweg d'Liewen och sou féieren, wéi di jeeweileg Relioun et virschreift, an Angscht hunn, wa se net follegen, hunn d'Reliounen d'Hell erfonnt. Mat deem Konzept vun der Angschtmaacherei konnte se hir Scheewercher iwwer Joerhonnerten an och nach haut no alle Reegele vun der Konscht manipuléieren.

Allianz von Humanisten, Atheisten an Agnostiker Lëtzebuerg a.s.b.l. (AHA), www.aha.lu

Mitglied *International Humanist and Ethical Union (IHEU)*

Mitglied *European Humanist Federation (EHF)*

Mitglied *Alliance for a Secular Europe*

Mitglied *Cercle de Coopération des Associations laïques (CCAL)*